



Komunikado

22 di yüni 2022

Cft: "Rekuperashon frágil di presupuesto di Kòrsou den 2022 i 2023; mester kontrolá gastunan"

Willemstad – For di e di dos mitar di 2021 ekonomia di Kòrsou a bin ta muestra un rekuperashon substansial. Kòrsou mester utilisá e periodo di rekuperashon aki pa strukturalmente pone su presupuesto strukturalmente na òrdu, i durante e proseso aki, e mester kontrolá su gastunan. Den su kòmbersashonnan resien ku gobièrnu di Kòrsou, Kolegio di supervishon finansiero pa Kòrsou i Sint Maarten (Cft) a urgi esaki. Kòrsou ta reduciendo su défisitnan di mas aña entre otro komo konsekuensia di e progreso ku ta logrando ku kobransa di impuesto, pero e desafionan ta keda grandi. Mundialmente inflashon a subi konsiderablemente i estorbonan kontínuo den e kadena logístiko por pone preshon riba e rekuperashon. Redukshon di e debe nashonal te na un nivel aseptabel tambe ta keda un problema. Ademas mester introdusí reforma pa por sigurá durabilidad di e sistema di kuido i e sistema di seguro sosial pa futuro. Pa e motibu aki, apesar ku Kòrsou ta logrando entradanan di impuesto mas haltu, kòntrol di su gastunan i introdukshon di reformanan ta keda di sumo importansia.

Pa e aña aki Banko Sentral di Kòrsou i Sint Maarten ta kalkulá un kresementu ekonómiko real di 5,2 porshento. IMF ta kalkulá pa 2022 un kresementu ekonómiko di 6,5 porshento. E espektativa ta ku den 2022 inflashon lo subi te riba 6 porshento. Den 2022-2023 ekonomia ta yega bèk na e nivel di promé ku e krisis di COVID-19.

Añanan largu durante di kua ekonomia a bai atras, huntu ku un debe nashonal kresiendo, tabatin un efekto hopi negativo riba e finansa públiko. E debe nashonal di Kòrsou aktualmente ta e montante di ANG 4,3 miar. Esaki ta 84 porshento di GDP (produkto interno bruto). Kòrsou ta pará dilanti di un desafío grandi pa redusí su debe nashonal i hiba esaki mas lihé posibel na un nivel sostenibel. Un kombinashon di e reformanan den e Pakete Nashonal, un maneho presupuestal estrikto, disiplina presupuestal rígido i redukshon struktural di e gastunan den sektor públiko, kuido i seguro sosial mester hiba na redukshon di e debe nashonal.

Presupuesto 2022 i 2023

Kòrsou ta trahando riba un adaptashon di presupuesto a base di kua lo redusí e défisit riba servisio komun (gewone dienst) te ANG 123 mion (2,3 porshento di GDP) den 2022, miéntras ku for di 2023 lo realisá un surplus. E surplus entrante 2023 ta di importansia, pasobra ta ku e montante aki por kuminsá paga e debe. Tantu e défisit ahustá di 2022 di ANG 123 mion komo e surplus kalkulá di ANG 8 mion (0,2 porshento di GDP) den 2023 ainda ta frágil. En parte e karakter struktural insigur di e entradanan di impuesto aktual i e retonan den e sektor di kuido i seguro sosial, ta pone ku kòntrol di gastu - entre otro di gastunan di personal (overtaim) i produktonan i servisionan - ta keda di gran importansia. Kòrsou mester limitá mas tantu posibel den tempu medidanan insidental ku ta kondusí na pèrdida di entrada, manera kompensashon di e preisnan di kombustibel. Si no, lo mester bini ku medida pa kompensá e pèrdida di entrada aki. Na mes momento mester implementá ku hopi determinashon medidanan pa subi entrada, manera introdukshon di pago pa pèrmit pa kompanianan ku ta brinda serevisio di weganan di azar (hazard).



Kòrsou por amplia su poteshonal pa krese su ekonomia, si e implementá reformanan duradero den su ekonomia i den gobièrnu. Invershonnan dirigí, por ehèmpel den infrastruktura, i reformanan dirigí por ehèmpel pa logra adaptashon den e sistema di pèrmit, por kontribuí den forma konsiderabel na un kresementu ekonómiko duradero. Kòrsou mester utilizá maksimalmente tambe e oportunidatnan ku e Paketa Nashonal ta brinda.

Impuesto

Den e último aña Kòrsou tabata eksitoso ku kobramentu di impuesto atrasá i mehoramentu di kumplimentu ku deber di paga impuesto (compliance). Pues e loke a presupuestá pa rekuperashon di finansa públiko riba término di mas aña, ta keda impulsá pa entradanan mas haltu di impuesto. Esaki na su turno lo mester bira resultado di un efekto struktural di e akshonnan aktual di kobransa di impuesto. Cft a pidi Kòrsou pa garantisá e resultadonan aki riba un término di mas aña pa medio di un optimalisashon mas aleu di tantu e Servisio di Impuesto i di e sistema fiskal.

Kuido i seguro sosial

Un bes mas Cft a enfatisá ku ekonomisashon den kuido médiko i seguro sosial ta nesario pa por garantisá ku por sigui paga esakinan i tambe pa por garantisá e kalidat di e sistema sosial pa e añanan benidero. Tur aña Kòrsou ta paga un kontribushon di ANG 306 mion na e fondonan sosial for di presupuesto i ademas e ta obligá pa paga e défisitnan den e fondo ku ta fluktuá (schommelfonds). Den 2021 gobièrnu a tuma e desishon pa tuma 15 medida ku mester perkurá ku e fondo ku ta fluktuá lo keda den ekilibrio den 2022 i 2023. Pa loke ta trata algun di e medidanan aki ya kaba tin retraso, loke ta pone ku riba término kòrtiku mester tuma medida di kompensashon. Den e cuadro ei Cft ta muestra tambe riba e hecho ku pa awor aki Kòrsou no ta logra realisá e ekonomisashonnan basá riba efisiensia den kuido. Ta trata aki di ekonomisashonnan ku gobièrnu a primintí den 2018 pa kubri e gastunan di ekplotashon mas haltu ku Curaçao Medical Center a trese kuné. Prinsipalmente pa loke ta trata limitashon di e remedinan di kuido propio i sustitushon di remedinan spesífiko pa remedinan genérikos, tin muchu tiki progreso. Cft a pidi Kòrsou pa introdusí e medidanan aki mas lihé posibel.

Cft a bishitá Kòrsou entre 20 te ku 22 di yùni 2022 i a hiba kòmbersashon ku Gobernadó, Minister di Finansa, Minister di Desaroyo Sosial, Labor i Bienestar, Konseho di Minister i e Komishon Finansiero di Parlamento. Cft a papia tambe ku gerensia di Banko di Seguro Sosila (SVB).

[Fin di Komunikado]

Foto:

Sharson Smith

Teksto pa foto:

Segun Cft kònròl di gastunan ta keda di gran importansia pa Kòrsou.

Nota pa redakshon – no pa publikashon

Kontakto na Cft:

Sekretariado Kolegionan di supervishon finansiero

Telefòn +5999 461-9081 / +5999 461-9082 / +5999 461-9084

Email info@cft.cw

Website www.cft.cw

Persona di kontakto pa prensa:

Jefka Alberto

Telefòn +5999 512-6861